

На благословении хлебов Богородице Дево: дважды, и тропарь новомучеником, глас 4, единожды.

Тропарь новомучеником, глас 4:

Днесь радостно ликует Церковь Русская, / прославляющи новомученики и исповедники своя: / святители и иереи, / царственные страстотерпцы, / благоверныя князи и княгини, / преподобныя мужи и жены / и вся православныя христианы, / во дни гонения безбожнаго / жизнь свою за веру во Христа положившия / и кровью Истину соблюдшия. / Тех предстательством, Долготерпеливе Господи, / страну нашу в Православии сохрани // до скончания века.

НА УТРЕНИ

На Бог Господь: *тропарь воскресен (дважды).*

Слава, *новомучеником. И ныне*, Богородичен.

По 1-м стихословии седален, глас 4:

Новомученики Российстии! кровию своею веру запечатлевши! Владыку всех моли! Церковь Русскую в Православии утверди! / землю нашу от скверн очисти! / люди во благочестии сохрани! / во общее всех спасение.

По 2-м стихословии седален, глас 4:

Иже в земли Российстей новомученик и исповедник Твоих, яко багряницею и вином, кровью Церковь Русская, украсившия, Христе Боже, теми вопиет Ти: / людям щедроты твои ниспосли, мир жительству Твоему даруй / и душам нашим велию милость.

Величание:

Величаем вас, / святии новомученицы и исповедницы Российстии, / и чтим честная страдания ваша, / яже за Христа / претерпели есте.

Псалом избранный:

Бог нам прибежище и сила, / помощник в скорбех, обретших ны зело. **Сего** ради не убоимся, внегда смущается земля, и прелагаются горы в сердца морския. **Возшумеша** и смятошася воды их, смятошася горы крепостию Его. **Речная** устремления веселят град Божий: оставил есть селение свое Вышний. **Бог** посреде его, и не подвижится: поможет ему Бог утро заутра. **Смятошася** языцы, уклонишася царствия: даде глас свой Вышний, подвижеся земля. **Господь** сил с нами, заступник наш Бог Иаковль. **Приидите** и видите дела Божия, яже положи чудеса на земли: **Отъемля** брани до конец земли, лук сокрушит и сломит оружие, и щиты сожжет огнем. **Упраздни**теся и уразумейте, яко Азь есмь Бог: вознесуся во языцех, вознесуся на земли. **Господь** сил с нами, заступник наш Бог Иаковль.

Аще храм святым, по полиелеи седален, глас 6: Творение святителя Афанасия Ковровскаго:

Мужайся, Христова Церковь, / и державствуй над всею борющимися! / Христови бо друзи о тебе пекутся / и, предстояще и обстояще, / ихже общий праздник / ныне совершаеши светло.

Прокимен, глас 4: Проидохом сквозе огонь и воду, / и извел еси ны в покой.

Стих: Разжегл ны еси, якоже разжизается сребро.

Евангелие от Матфея, зачало 36 (10, 16-22).

По 50-м псалме стихира, глас 6:

Церкве Русския столпи непоколебимии, / соборе новомучеников и исповедников Российских, / сердцем верующе в правду, / усты Господа Иисуса Христа исповедали есте во спасение, / и заточения, изгнания, горькия работы и смерть / Бога ради сладце претерпели есте. / Темже тепле

молитесь ко Господу,/ Русь Святую в Православии утвердити/ и спасти души наша.

Канон новомучеником, глас 6.

Песнь 1

Ирмос: Сеченное сечется/ море Чермное,/ волнопитаемая же изсушается глубина,/ таяжде купно безоружным бывши проходима и всеоружным гроб./ Песнь же богокрасная воспевашеся:/ славно прославися Христос Бог наш.

Песнь 3

Ирмос: Господь Сый всех и Зиждитель Бог,/ созданное, безстрастный обнищав, Себе соедини,/ и Пасха, за яже хотяше умерети,/ Сам Сый Себе предпожре/ ядите, вопия, Тело Мое,/ и верою утвердитесь.

Песнь 4

Ирмос: Провидев пророк/ тайну Твою неизреченную, Христе, провозгласи:/ положил еси твердую любовь крепости, Отче Щедрый,/ Единородного бо Сына, Благий,/ очищение в мир послал еси.

Песнь 5

Ирмос: Союзом любви/ связуеми апостоли,/ владычествуящему всеми себе Христу возложше,/ красны ноги очищаху,/ благовествующе всем мир.

Песнь 6

Ирмос: Бездна последняя грехов обыде мя/ и волнения не ктому терпя,/ яко Иона, Владыце вопию Ти:/ от тли мя возведи.

Кондак новомучеником, глас 3. Подобен: Дева днесь:

Днесь новомученицы Российстии/ в ризах белых предстоят Агнцу Божию/ и со Ангелы песнь победную воспевают Богу:/ благословение, и слава, и премудрость,/ и хвала, и честь,/ и сила, и крепость/ нашему Богу/ во веки веков. Аминь.

Песнь 7

Ирмос: Отроцы в Вавилоне/ пещнаго пламене не убояшася,/ но посреде пламене ввержени,/ орошаемы пояху:/ благословен еси Господи Боже отец наших.

Песнь 8

Ирмос: За законы отеческия/ блаженнии в Вавилоне юношы предбедствующе,/ царюющаго оплеваша повеление безумное,/ и, совокуплены, имже не сваришася огнем,/ державствующему достойную воспеваху песнь:/ Господа пойте, дела,/ и превозносите во вся веки.

Песнь 9

Ирмос: Странствия Владычня/ и безсмертныя трапезы на Горнем месте/ высокими умы,/ вернии, приидите, насладимся/ возшедша Слова,/ от Слова научившеся,/ Егоже величаем.